

ՆԱԽՈՒՄԱՅ

1

2

3

ԳԼՈՒԽ 1

Նինուէի պատգամը եւ Ելկեսացի Նաւումին տեսիլքին գիրքը:

² Եհովան նախանձոտ ու վրէժխնդիր Աստուած է: Եհովան վրէժ առնող ու բարկութեան տէր է: Եհովան իր հակառակորդներէն վրէժ կ'առնէ, Իր թշնամիներուն դէմ ոխ կը պահէ:

³ Եհովան երկայնամիտ է ու անոր զօրութիւնը մեծ է, Բայց յանցաւորը ամենեւին անպարտ չի թողուր: Եհովային ճամբան մրրիկի ու փոթորիկի մէջ է Ու ամպերը անոր ոտքերուն փոշին են:

⁴ Ծովուն կը սաստէ ու զանիկա կը ցամքեցնէ Եւ բոլոր գետերը կը չորցնէ: Բասանն ու Կարմեղոսը կը թառամին Եւ Լիբանանի ծաղիկը կը թառամի:

⁵ Լեռները անկէ կը դողան ու բլուրները կը հալին: Երկիրը անոր երեսէն կը խախտի, Աշխարհն ու անոր բոլոր բնակիչները:

⁶ Անոր ցասումին առջեւ ո՞վ կրնայ կենալ Եւ անոր սաստիկ բարկութեանը Ո՞վ կրնայ դէմ դնել: Անոր սրտմտութիւնը կրակի պէս կը թափի Ու ապառաժները անկէ կը խորտակուին:

⁷ Եհովան բարի է, նեղութեան օրը ամրութիւն է, Իրեն ապաւինողները կը ճանչնայ:

⁸ Բայց այն քաղաքին տեղը յորդահոս հեղեղով բոլորովին պիտի ջնջէ Եւ խաւարը պիտի հալածէ անոր թշնամիները:

⁹ Եհովային դէմ ի՞նչ կը ծրագրէք: Բնաջինջ ընողը անիկա է: Թշնամիներէն երկրորդ անգամ վրէժ պիտի չլուծէ:

¹⁰ Քանզի անոնք՝ փուշերու պէս փաթթուած Ու իրենց ըմպելիքովը գինովցածի պէս են, Բոլորովին չորցած յարդի պէս պիտի այրին:

¹¹ Քեզմէ՝ Եհովային դէմ չարութիւն մտածող մը, Անօրէն խորհրդական մը ելաւ:

¹² Տէրը այսպէս կ'ըսէ. «Թէեւ անոնք խաղաղութեան մէջ են ու բազմաթիւ են, Սակայն անոնք պիտի կոտորուին ու անցնին: Թէեւ քեզ նեղեցի, ա՛լ պիտի չնեղեն:

¹³ Հիմա քու վրայէդ անոր լուծը պիտի վերցնեն Ու քու կապերդ պիտի կտրեն»:

¹⁴ Տէրը քեզի համար հրամայեց, Անգամ մըն ալ քու անունդ պիտի չտարածուի: Քու աստուածներուդ տունէն Քանդակուած եւ ձուլածոյ կոտքերը բնաջինջ պիտի ընեն: Զանիկա քու գերեզմանդ պիտի ընեն, Քանզի դուն անարգ եղար»:

¹⁵ Ահա լեռներուն վրայ աւետիս բերողին, Խաղաղութիւն քարոզողին ոտքերը: Տօներդ պահէ՛, ո՛վ Յուդա, ուխտերդ կատարէ՛. Քանզի ա՛լ քու մէջէդ անօրէն պիտի չանցնի, Անիկա բոլորովին կտրուեցաւ:

ԳԼՈՒԽ 2

Խորտակողը քու երեսիդ դէմ ելաւ: Պարիսպը պահպանէ՛, ճամբան դիտէ՛, Սէջքերդ ուժովցո՛ւր ու բոլոր ոյժդ վրադ հաւաքէ՛:

2 Քանզի Տէրը Յակոբին վայելչութիւնը Իսրայէլին վայելչութեանը պէս նորոգեց, Վասն զի աւարառունները զանիկա կողոպտեցին Ու անոնց որթատունկին ճիւղերը աւերեցին:

3 Անոր զօրաւոր մարդոց վահանը կարմրեցաւ Անոր քաջ մարդիկը ծիրանի հագան: Անոր պատրաստութեանը օրը կառքը պողպատի փայլունութիւն՝ պիտի ունենայ, Նիզակները պիտի երերցունին:

4 Կառքերը փողոցներուն մէջ պիտի կատողին, Հրապարակներուն մէջ իրարու պիտի բաղխին: Անոնց երետոյթը ջահերու պէս պիտի ըլլայ Ու փայլակներու պէս պիտի վազեն:

5 Իր կտրիճները պիտի յիշէ: Անոնք քալած ատեննին պիտի գլորին, Իսկ թշնամիները պարսպին մօտենալու պիտի արտորան Ու պատսպարան պիտի պատրաստուի:

6 Գետերուն դռները պիտի բացուին Ու պալատը պիտի փլչի:

7 Ու նախասահմանուեցաւ, որ անիկա գերութեան ելլէ Եւ անոր աղախինները կուրծքերնուն զարնելով Ու աղանիի պէս մնչելով անոր հետ երթան:

8 Նինուէն շատ ժամանակէ ի վեր ջուրերու աւազանի պէս էր. Սակայն անոնք փախչելով՝ ‘Կայնեցէ՛ք, կայնեցէ՛ք, պիտի ըսեն, Բայց դարձող պիտի չըլլայ:

9 Արծաթ յափշտակեցէ՛ք, ոսկի յափշտակեցէ՛ք, Քանզի անոր զարդերը անթիւ են Ու ամէն ցանկալի սպասներու առատութիւն կայ:

10 Պարապ ու պարպուած ու դատարկուած է: Սրտերը կը հալին ու ծունկերը իրարու կը զարնուին, Բոլոր մէջքերը կը դողան Ու ամենուն երեսները գոյներնին կը նետեն:

11 Ո՞ր է առիծներուն բնակարանը Եւ առոյգ առիծներուն արօտը: Արու առիծը, մատակ առիծը Ու առիծին կորիւնը ո՞ր կը պտըտէին: Ջանոնք վախցնող չկայ:

12 Առիծը իր կորիւններուն բաւական եղածին չափ կը պատառէր Ու իր մատակ առիծներուն համար կը խեղդէր: Իր մորիները՝ որսով, Իր բնակարանները յափշտակութեամբ կը լեցնէր:

13 «Ահա ես քեզի դէմ եմ, կ’ըսէ զօրքերու Տէրը, Եւ քու կառքերդ պիտի այրեն ու ծուխի պիտի դարձնեն: Սուրը պիտի ուտէ քու առոյգ առիծներդ: Քու որսդ երկրի վրայէն պիտի ջնջեն Եւ քու դեսպաններուդ ծայրը անգամ մըն ալ պիտի չլսուի»:

ԳԼՈՒԽ 3

Վա՛յ արիւններու քաղաքին Որ բոլորովին ստութեամբ ու յափշտակութեամբ լեցուն է: Հոն որսը պակաս չէ:

2 Ահա խարազանին ծայրը, Անիւին շարժման ծայրը, Սրընթաց ձիուն ու ցնցուող կառքին շաչիւնը:

3 Ձիաւորը կը վերցնէ փայլուն սուրը ու շողշողուն նիզակը՝ Եւ շատ վիրաւորներ ու խիստ շատ մեռելներ կ’ըլլան: Դիակները անթիւ են, անոնք դիակներուն վրայ կը գլորին

4 Պոռնիկին պոռնկութիւններուն շատութեանը համար, Որ խիստ շնորհալի ու կախարդութիւններու տէր ըլլալով՝ Իր պոռնկութիւններովը՝ ազգեր Եւ իր կախարդութիւններովը ազգատոհմեր կը ծախէր:

5 «Ահա ես քեզի դէմ եմ, կ’ըսէ զօրքերու Տէրը: Քու երեսիդ դէմ քու քղանցքդ պիտի բանամ, Քու մերկութիւնդ՝ ազգերուն, Քու անարգանքդ թագաւորներուն պիտի ցուցնեն:

6 Քու վրադ պղծութիւններ պիտի նետեն, Քեզ խայտառակ պիտի ընեն, Քեզ իբր օրինակ պիտի դնեն»:

7 Ամէն քեզ տեսնող Քեզմէ պիտի փախչի ու պիտի ըսէ. ‘Նինուէն աւերակ եղաւ, Անոր վրայ ո՞վ պիտի ողբայ’: Քեզի ուրկէ՞ մխիթարիչ փնտռեն:

- ⁸ Միթէ դուն Նով-Ամոնէն աղէ՞կ ես, Որ գետերուն քով կը բնակէր Ու ջուրերով շրջապատուած էր, Ծովը անոր խրամն էր, Ջուրը անոր պարիսպն էր:
- ⁹ Անոր զօրութիւնը՝ Եթովպիա ու Եգիպտոս էին Ու ծայր չունէր: Փութացիներն ու Լիբէացիները քեզի օգնական էին:
- ¹⁰ Անիկա ալ աքսորուեցաւ ու գերութեան գնաց, Անոր տղաքներն անգամ ամէն ճամբու գլուխ գետինը զարնուեցան, Անոր պատուական մարդոց վրայ վիճակ ձգեցին: Անոր բոլոր մեծամեծները շղթաներով կապուեցան:
- ¹¹ Դուն ալ պիտի գինովնաս ու անյայտ ըլլաս, Դուն ալ թշնամիէն պահուելու տեղ պիտի փնտռես:
- ¹² Քու բոլոր բերդերդ կանխահաս պտուղներ ունեցող թզենիներու պէս պիտի ըլլան, Որոնք երբ թօթունեն, ուտողին բերանը կ'իյնան:
- ¹³ Ահա քու ժողովուրդդ քու մէջդ կիներու պէս պիտի ըլլան, Քու երկրիդ դռները անշուշտ քու թշնամիներուդ ամօքի պիտի բացուին, Կրակը պիտի ուտէ քու նիգերդ:
- ¹⁴ Պաշարումի համար քեզի ջուրեր քաշէ՛, Բերդերդ ամրացո՛ւր. Ցէխի մէջ մտի՛ր ու կաւը կոխէ՛ Եւ աղիւսին փուռը նորոգէ՛:
- ¹⁵ Հոն կրակը քեզ պիտի ուտէ, Սուրը քեզ պիտի կտրտէ, Ջորեակի պէս քեզ պիտի հատցնէ, ուստի Քեզ ջորեակի պէս շատցուր, Քեզ մարախի պէս շատցուր:
- ¹⁶ Քու վաճառականներդ երկնքի աստղերէն աւելի շատցուցիր. Ջորեակը տարածեց իր թելերը, ետքը թռաւ:
- ¹⁷ Քու թագակիրներդ մարախի պէս, Ջօրավարներդ անթիւ մարախներու պէս են, Որոնք ցուրտ օրը ցանկերու վրայ կը հանգչին. Երբ արեւը ծագի՝ կը չունեն Ու անոնց ո՛ր ըլլալը չի գիտցուիր:
- ¹⁸ Քու հովիւներդ կը քնանան, ո՛վ Ասորեստանի թագաւոր, Քու ազնուականներդ կը պառկին, Քու ժողովուրդդ լեռներու վրայ ցրուեցան Ու մէկը չկայ որ զանոնք հաւաքէ:
- ¹⁹ Քու կոտորածքիդ ճար չկայ, Քու վերքդ անդարմանելի է. Ամէն անոնք որ քու լուրդ կը լսեն՝ քեզի համար ծափ կը զարնեն, Քանզի քու չարութիւնդ որո՞ւ վրայ եկած է:

For other languages please go to www.wordproject.org